

387

& complicibus reliquis, asserentes, DEUM quandoque statuere, quæ antea minimè, aut quorum contraria decreverit; solere etiam revocare sententiam suam adversus hunc vel illum jam sancitam. Glaucoma sibi ipsis offundunt, quia mundum in tempore condendò evaserit creator, qualis antea non fuerit; id quod Philosophis quoque Ethnicis scrupulum iniecit, ut cornutò inferirent Enthymemate, aut æternum esse mundum, aut DEUM mutabilem: Deinde, quia in sacris etiam pœnitere dicatur, quod Voluntatis arguat mutationem. Istæ tamen accuratiùs pensanti levi veritatis aurâ facilè discutiuntur nebulæ. Quid enim quæso eò advertis in DEO variabile, quod hanc rerum produxerit universitatem? nihil accepit, nihil amisit in sese ideoque nec in agente actio ista, sed objectò solummodò ponit mutationem, & quamvis nova hinc surgit denominatio, non tamen est intrinseca, sed extrinseca, de quâ ne vel minima in creante Subjectò alteratio; nec compositionem facit, quòd antea audierit Causa Orbis in potentiâ, nunc verò in actû, quasi potentia illa priùs fuerit privata aliquâ perfectione, quam postea communicando rebus novum esse acceperit, adeoque ex potentia passiva actuque informante demùm completa extiterit: nihil enim tale in DEO locum habet, cum sit actus purissimus, nihil unquam involvens passivi. Nec quicquam derogat pœnitentia in Scripturis decantata; ut alia plura; sic & hoc ἀνθρώπων πένθος Numini tribuitur intelligendum θεωπενθός. Etenim non designat affectum, ac si more humano doleret de eventû præter spem ingruente, sed effectum, certâ sub conditione jam prævisum ac susceptum, adeò, ut si, quam hæcenus suggessit gratiam, detrahat impiis, aut aboleat, quod fuit, pœnitere perhibeatur, cum antea eâ lege ac fine agere constituisset: quò spectant verba Augustini: *Ideo DEUS dicitur immutabilis, quia in naturâ ejus ira, furor, pœnitentia, oblivio, recordatio, & alia his similia illi nullò modò accidunt: Simplex enim natura est, & immutabilis atque imperturbata, neque aliud est ipse, & aliud quod habet, & quod est.*

§. 5.

Immortalitatem vellicabat dogma Eutychianum mosque lo-
 E quendi,